

## Hawaiian - Agape Bible - Salvation Scriptures

Fo Da Efesus Peopo 2:2 Wen was dat time, you guys wen go make jalike all da odda peopo all ova da world. You guys wen like listen to da Bad Guy, I talking bout da guy dass da leada fo all da bad kine spirits up inside da sky. An you guys wen like go do wat he wen tell you guys fo do. Az da same spirit dat go make peopo go tink fo go againsts wat God say.

Matthew 6:10 We like You come King fo everybody now. We like everybody make jalike You like, Ova hea inside da world, Jalike da angel guys up inside da sky make jalike You like.

Luke 22:42 like dis: "Fadda, if You like, no let me suffa lidis. But gotta be da way You like, not da way I like."

John 16:7-9 Dis da trut, wat I stay telling you guys: Mo betta fo you guys if I go way. Cuz if I no go way, da One Who goin kokua you guys no goin come hea. But if I go way, den I goin send Him to you guys. 8 "Wen da Kokua Guy come, He goin show da peopo inside da world how dey mess up. Dat mean, da Kokua Guy goin show peopo dat dey do bad kine stuff, an dat dey no do wat stay right, an dat God goin be dea Judge. 9 He goin show dem dat dey do bad kine stuff, cuz dey no like trus Me.

Numba 2 Fo Timoty 2:10 Dass why I stay hanging in dea wen dey do any kine to me -- cuz I like help da peopo God wen pick. If I do dat, den dey goin come tight wit Jesus Christ, an God goin take um outa da bad kine stuff dey stay in, an He goin make um come awesome jalike Him foeva.

Fo Da Rome Peopo 15:20,21 From long time befo I tinkin, "I really like tell bout Christ to da peopo dat neva hear notting bout da Good Stuff Bout Him!" Cuz I no like go teach wea get odda peopo stay teaching awready. 21 Jalike da Bible wen say befo time, "Da peopo dat neva have nobody fo tell um bout God, Dey da peopo dat goin see him. Da peopo dat neva hear notting befo time, Dey goin undastan."

Jesus Guys 2:36,37 "So, listen! All da Israel peopo gotta know dis fo shua: You guys wen kill dis Guy Jesus on top one cross, but God wen make Him da Boss, an He da Spesho Guy God Wen Send." 37 Wen da peopo hear dat, dea heart come sore, an dey tell Peter an da odda guys Jesus wen send all ova, "Bruddas, wat we goin do?"

Fo Da Hebrew Peopo 4:2 Now, we wen hear da Good Stuff From God jalike our ancesta guys. Dey wen hear da Good Stuff too, but dey neva like believe um. Az why da Good Stuff dey wen hear neva help dem.

Jeremiah 24:7 - Matthew 22:37 Jesus tell um, "Get love an aloha fo da Boss yoa God, wit all yoa heart, an wit everything inside you, an wit how you tink.

Jesus Guys 16:14 One wahine dea name Lydia wen listen. She sell purple cloth

from Tyatira town. She everytime go down an pray to God. Da Boss Jesus wen open her heart, an she wen like take in wat Paul wen say.

Matthew 13:14-16 Dey ack jalike da guys Isaiah wen talk bout befo time. He say, "You guys goin hear, But you no goin undastan. You guys goin see, But you guys no goin see fo real. 15 Cuz dis peopo get hard head, Dea ears no can hear good, Dey close dea eyes, Cuz dey no like see fo real, Dea ears, dey no like hear fo real kine, Inside dem, dey no like undastan notting. Dey no like change da way dey stay living, So I can make um come good.' " Dass wat God say. 16 "But you guys, you stay good inside cuz yoa eyes can see fo real an yoa ears can hear fo real.

Isaiah 6:9,10 - Jesus Guys 28:27 Cuz dis peopo hard head, Dea ears no can hear good. Dey close dea eyes, Cuz dey no like see fo real. Dea ears no like hear fo real. Inside dey no like undastan fo real. Dey no like change so I can make um come good." ' Dass wat Isaiah wen say."

Mark 4:11,12 So he say, "God let you guys know all da stuff bout how He stay King. But da odda peopo on da outside, I teach um wit stories. 12 Dass fo make happen jalike Isaiah wen tell dat God say, 'Dey see wat I stay do, but dey no can see fo real. Dey hear wat I say, but dey no can hear fo real. If dey really wen see an hear, Den dey goin change, An I goin let um go an hemo dea shame Fo all da bad kine stuff dey wen do.' "

John 12:39,40 Az why da Jewish peopo no can trus God nowadays, jalike Isaiah wen say one nodda time, 40 "God wen make um so dey no can see, An make um hard head, So dey no like see wit dea eyes, No like undastan wit dea head, No like change an come by Me, Cuz dey no like fo Me fo make um come good."

Fo Da Rome Peopo 11:7,8 So wat, den? Da Israel peopo wen like get um right wit God, but dey no can do dat. Ony da peopo God wen pick wen get um right wit him. Da oddas, dey ony wen come mo hard head still yet an dey no listen to God. 8 Dis wat da Bible wen say befo time: "God wen make um come Jalike dey no can tink o feel notting. Dea eyes no can see notting, Dea ears no can hear notting, Right up till now."

Numba 2 Fo Da Tessalonika Peopo 2:10,11 He goin do any kine fo bulai da peopo dat goin wipe out. Dey goin wipe out, cuz dey neva like listen an neva take da true stuff. Cuz if dey wen listen, den God wen take um outa da bad kine stuff dey doing. 11 So, God stay letting um tink wrong. Az why dey go trus peopo dat bulai dem big time.

Matthew 13:18-23 "Listen! Dis wat da story bout da farma mean. 19 Any guy hear da stuff bout da King in da sky, an no undastan, da Bad Guy come an take away da stuff dat da guy wen hear dat stay inside him. Dass jalike da seed dat fall down by da trail. 20 Da seed dat fall down on top da rocks, dass jalike one guy dat hear da good kine stuff, an he trus wat God tell him right den an dea, an he stay good inside. 21 But da guy, he no mo root. He stick wit um fo litto

wile, but wen da odda guys make him suffa cuz he trus da stuff he wen hear, den he give up. 22 Da seed dat fall down inside da kine bushes wit kukus, dass jalike one guy dat hear wat God say, but bumbye he worry bout all da kine stuff he need hea inside da world. He like come rich, an dat throw him off da track, so all dat stuff choke da stuff God say dat was inside him. He no can do da right tings, jalike one plant inside da kine bushes wit kukus dat no can give wheat. 23 Da seed dat fall down inside da good dirt, dass jalike one guy dat hear wat God say an undastan um. He do da right tings, jalike da good plant dat give wheat. Da good stuff dat guy do, he goin do good stuff hundred times moa, one nodda guy sixty times moa, one nodda guy thirty times moa.”

Numba 2 Fo Da Corint Peopo 3:15,16 Even now still yet, weneva da Jewish peopo read wat Moses wen write, dey listen, but dey no undastan, cuz dey no listen inside dea hearts, jalike dey get cover ova dea hearts. 16 But weneva somebody start fo trus da Boss, Christ help um undastan inside dea hearts. Jalike da Bible wen tell bout Moses, “He take away da ting dat cover his face.”

Hosea 11:3-7 - Matthew 11:28-30 “All you guys dat stay tired from working hard, an stay trying fo handle all da heavy kine stuff dat da Rules say, come! Come ova hea by Me. I make you guys rest now. 29 Jalike da oxes get yoke on top dem fo pull da load, you guys put My yoke on top you, an go learn fo do wat I teaching you. I stay gentle an I like take care peopo befo Me, so yoa hearts goin rest inside. 30 Cuz My yoke real good, an My load real easy.”

Jesus Guys 26:18 I goin send you fo open dea eyes an fo turn um away from da dark kine stuff to da light; fo turn um away from da Devil’s power an turn um to God. Den I goin let um go, an hemo dea shame fo all da bad kine stuff dey do, an dey can come togedda wit all da peopo dat trus me an come spesho an good fo me.’

Numba 2 Fo Timoty 2:24-26 But wen one guy work fo da Boss, he not suppose to like make argue, you know. He suppose to be friends wit everybody, an be one good teacha, an no stay huhu at da odda peopo. 25 Wen peopo talk agains him, he gotta teach um da true stuff, but do um nice. Den God can make dem change dea mind, an make dem so dey can know da trut. 26 Den dey can come smart an get outa da trap dey stay in, cuz da Devil wen catch um an make um do wat he like um fo do.

Wat Jesus Show John 3:17-19 You guys tink, ‘Me, I stay rich. I get plenny, an no need notting!’ Auwe! You guys donno still yet dat you all jam up! You guys no mo face, no mo money, no mo clotheses, an no can see! 18 “Now I goin tell you guys wat I like you guys fo do. Fo come rich inside, come by me an get da stuff you guys need. Dass jalike you guys goin buy da bestes kine gold, da kine dat dey put inside da fire fo take out da junk kine stuff. An den you guys come by me an buy white clotheses fo put on, fo take away da shame, cuz jalike you guys no mo clotheses! An den you guys come by me an buy da kine medicine fo put on top yoa eyes so you guys can see fo real kine! 19 Everybody I get

love an aloha fo, I tell um wen dey mess up, an I help um fo do da right ting. So, come on, go all out, come sorry, an no do da bad kine stuff no moa.

Numba 2 Fo Da Corint Peopo 7:10 Wen we stay sorry da way God like, den we pau do da bad kine stuff we was doing, we goin do diffren den befo. Dat goin make us come outa da kine bad stuff we stay doing, an den we no need worry bout um no moa. But wen we stay sorry da way da peopo inside dis world stay sorry, an not God's way, den we goin wipe out.

1 Kings 18:37 - God turn heart back to God

Numba 2 Fo Da Corint Peopo 4:4 Da Devil, he jalike da god fo da peopo nowdays. He wen make some peopo jalike dey blind inside dea heads. Az da peopo dat no trus da Boss who fo real. Dass jalike dey no can see da light. Dey no can undastan da Good Stuff bout how awesome Christ stay. Christ, He o same like God. He jalike one picha fo show how God stay.

Luke 8:11-15 Den Jesus tell, "Dis wat da story mean. Da seed, dass wat God say. 12 Da seeds dat fall down on top da trail, dass jalike da peopo dat hear. But da Devil come take away wat God say from inside dea heart, so dey no can trus God. Dass why God no can take um outa da bad kine stuff dey do. 13 Da seeds on top da rocks, dass da peopo dat take wat God say, an dey stay good inside wen dey hear um. Dey trus God litto bit, but wen get hard time dey pau trus, cuz dey no mo root, jalike da seeds on top da rocks. 14 Da seeds dat fall down inside da bushes wit kuku, dass da peopo dat hear, but den dey worry plenny, an dey like come rich an get plenny stuffs, an dey like play aroun all da time. All dat stuff grab um, an choke um. Dey no rememba wat God say, jalike da seeds dat no mo wheat cuz dey stay inside da bushes wit kuku. 15 But ho! Da seeds dat fall down inside da good dirt, dass jalike da peopo dat hear an rememba wat God say. Dey get good heart, do da right ting, an no give up. Dey jalike da seeds dat give good kine wheat."

Jesus Guys 15:11 No can! We trus dat we wen come outa da bad kine stuff we do, not cuz we do wat da Rules say, but cuz da Boss Jesus wen do plenny good tings fo us, jalike He wen do fo da peopo dat not Jews."

Fo Da Rome Peopo 8:13 If you guys go ack jus da way you stay inside, fo shua kine you goin cut yoaself off from God! But den, if you let God's Spirit help you kill off all da bad kine stuff you do wen you live da way you like, den you goin live fo real kine.